

Casa Cuna Progreso ta Celebra nan 50 aniversario cu Bus nobo

Logo Nobo y Edificio Renoba

STA. CRUZ—Aña pasa Casa Cuna a organiza un fundraising di 'Family Day' pa recauda fondonan pa asina yega na nan meta di renova nos cas di mucha y cumpira Bus Nobo.

Casa Cuna Progreso tin e gran placer pa informa pueblo cu danki na sosten di pueblo en general, Service Clubnan, comerciantenan grandi y chikito, companianan di seguro, compania di telefon, tur banco di Aruba, enfin full e comunidad, cu a logra e meta cu a pone dilanti. Tur voluntario y comerciante cu a aporta y yuda den e actividad grandi di aña pasa. E medionan di comunicacion como radio, corant y television cu semper ta hunga un rol importante. Gradicimientu pa aporte e financiero substancial pa e proyecto di 2003 – 2007. Aparte di e sosten en general cu a ricibi di e comunidad, toch ta kere cu e ta necesario y na su lugar pa gradici algun di dunadornan cu a duna un aporte financiero grandi durante e cuatro añanan pa cu e proyecto di renovacion. Banda di e nombernan menciona tin hopi donador cu ta prefera di ta 'silent donators' y nan tambe ta wordo gradici. Metanan di Casa Cuna Progreso cu a pone dilanti pa e añanan 2003 te cu 2007, es decir renovacion completo di nos Cas di Mucha, bus Nobo, Parke di Recreacion, Muraya rond di edificio, Renovacion di dak, bentana y portanan, drechamento di emurayan, kambenan, material pedagogico pa mayor y muchanan, trayecto di curso pa personal a ser logra. Muy en particular Aruba Way Foundation, Cede Aruba, Samenwerkende Fondsen, Ike Cohen foundation, Mariniers Kazerne, Bright

Bakery & Healthy Living Club, KPMG, Rica Foods, Meta Corp, Kiwani's Palm Beach y Rotary Club.

Metanan pa 2007 – 2011

Pa aña 2007-2009 lo concentra riba renovacion di meubelair, material pa e muchanan y educacion en general pa clientenan. Concentra mas riba Plan di Maneho Pedagogico pa mucha y nan mayor y protocolnan. Trahamento hunto cu diferente organizacion cu tin e mesun grupo cu ta traha cu ne. Trahamento hunto cu diferente NGO y gobierno, pa hunto mehora e posicion di NGO nan na Aruba. Casa Cuna Progreso ta spera cu pa e añanan cu ta bin lo por drecha e posicion financiero di Casa Cuna Progreso y tambeposicioncomodunador di un servicio importante. Lo sigui conta ariba comunidad pa nan sosten financiero pa mantencion di edificio.

LOGO NOBO

E Logo tin color nobo y tambe e parti humano a ser accentua cu un figura den e cas.

Sra. Annushka Henriquez a wordo inspira hunto cu algun colega pa traha un logo nobo. Di mas of menos 15 logo, e loga aki, personal hunto cu e directiva a escoge. Kico esaki ta significa? E

logo ta significa e seguridad di e cas cu semper Casa Cuna a brinda, pero bay bek na e color di antes cu un toke di ora pa cora riba e 50 añanan di existencia. E color Bordeaux ta e color moderno cu ta significa e lucha pa e 50 aña cu ta dilanti cu lo sigui bringa y yuda esnan den mas necesidad di nos comunidad. Casa Cuna ta traha pa e comunidad y cu e comunidad.

E parti humano ta wordo reflesha den e persona den e cas cu ta yuda den un forma structural y cu amor y profesionalismo. E braza di confianza, e braza di seguridad cu ta brinda na e muchanan ta visible den e Logo Nobo. E sosten na e mayor pa yuda educa nan y stimula nan pa ta un Mayor pa nan yiu, tur esaki ta wordo reflesha den e Logo Nobo. Casa Cuna kier brinda pa e 50 aña cu ta bin un guia pedagogico y un base firme pa e muchanan y un sosten pa mayor pa anda cu nan yiu y nan situacion.

Openhouse 23 di Juni

Dia 23 di Juni Casa Cuna lo organiza un Openhouse pa asina tur hende por pasa na Casa Cuna, cas di mucha y goza di un ambiente familiar cu musica y wega pa mucha. Tur esnan cu a contribui por waak e realizacion di e proyecto.

